

“Тараққиёт” кашф этган истеъдодлар

Бугун юртимизда зукко, билимли ёшларга ўз истеъдодларини намоён этиши учун барча шарт-шароитлар яратилган. Буларнинг барчаси мустақил фикрлайдиган ёшларни тарбиялашдек эзгу мақсад йўлида амалга ошириляётган кенг кўламли ислохотларнинг амалдаги ифодасидир.



2018 йил 30 майдаги Республика Президентининг “Истиқболли бошқарув кадрларини танлов асосида танлаб олишнинг замонавий тизимини яратиш чора-тадбирлари тўғрисида”ги Қарори ҳам айнан ана шундай салоҳиятли ёшларимиз учун яна бир имкониятдир.

Танлов Ўзбекистон Республикаси Президенти ҳузуридаги Давлат бошқарув академияси, Инновацион ривожланиш вазирлиги ва “Буюк келажак” Халқаро нодавлат-нотижорат ташкилотлари ҳамкорлигида ташкил этилган бўлиб, натижалари бўйича давлат ва хўжалик бошқаруви органларининг, маҳаллий ижро этувчи ҳокимиятларнинг ва бошқа ташкилотларнинг юқори малакали кадрлари аниқланиб, йўналишлар доирасида давлат ташкилотларига раҳбарлик лавозимларига тайинланиши белгиланган эди.

Давлат ва жамият бошқаруви, суд-ҳуқуқ, молия-саноат, иқтисодиёт, АКТ, қишлоқ хўжалиги, архитектура ва қурилиш, солиқ, божхона, фан-таълим ва маданият, соғлиқни сақлаш, ташқи сиёсат, транспорт-логистика соҳасидаги энг яхши бошқарувчи каби 16 номинациялар бўйича танлов ўтказилди.

Уй-жой коммунал хизмат кўрсатиш вазирлиги иссиқликтаъминоти объектларидан фойдаланиш бошқармаси бошлиғи ўринбосари, бўлим бошлиғи Джонрид МИРЗАЕВ “Комму-

нал хўжалик соҳасидаги энг яхши бошқарув” номинацияси бўйича танловда 1-ўрин соҳиб бўлди. Шу муносабат билан эришган муваффақиятлари билан қутлаш ҳамда танлов шартлари ва натижаларини билиш мақсадида қаҳрамонимизни суҳбатга тортдик.

– Джонрид Абдураходович, ушбу танловнинг йўналиши ва унинг иштирокчилари тўғрисида маълумот берсангиз.

– Мамлакатимизда истиқболли бошқарув кадрларини тизимли танлаб олишни таъминлаш, шунингдек, давлат ва хўжалик бошқаруви, маҳаллий ижро этувчи ҳокимият ҳамда бошқа давлат органлари ва ташкилотлари тизимида уларнинг касбий малакасини узлуксиз ошириб боришга кўмаклашиш мақсадида ташкил этилган “Тараққиёт” биринчи танловида 8 минг 334 номзод рўйхатдан ўтган бўлса, ишчи гуруҳ томонидан тавсия этилган 3 минг 825 талабгордан 100 нафар иштирокчи финал босқичига йўллангани қўлга киритди, 50 нафар иштирокчи якуний босқичда ғолиб бўлди.

– Танлов қай тартибда амалга оширилди?

– Қарийб 10 ой давом этган танловда асосан олий маълумотга эга, тегишли соҳада камида 3 йил раҳбарлик лавозимида фаолият юритган 30 ёшдан 45 ёшгача бўлган Ўзбекистон фуқаролари қатнашдилар. Танлов

4 босқичда амалга оширилди. 1-босқичда веб-сайтдан рўйхатдан ўтиб, анкета тўлдирилди. Сўнг ақлий салоҳият (IQ) тест, психологик барқарорлик ва хорижий тилларни билиш даражаси аниқланди. Кейинги босқичларда иштирокчиларнинг сиёсий-ҳуқуқий ва ижтимоий-иқтисодий билимлари синовдан ўтказилди. Шунингдек, йўналиш бўйича белгиланган мавзу доирасида ёзма-таҳлилий ҳужжат ёздик. Шундан сўнг лидерлик қобилияти ва стрессга чидамлик бўйича ҳам синовдан ўтдик. Сўнгги босқичда эса барча йўналишлар бўйича касбий маҳорат ва тажрибаларимиз ҳайъат аъзолари суҳбатидан ўтиш орқали баҳоланди.

– Танловдан сўнг ғолиблар қандай имтиёз ва имкониятларга эга бўлдилар?

– Яқинда Ўзбекистон Республикаси Президенти ҳузуридаги Давлат бошқаруви академиясида тақдирлаш маросими бўлиб ўтди. Ғолиблар тегишли йўналишлар бўйича давлат ташкилотларига раҳбарлик лавозимларига тайинландилар. Шунингдек, уларга энг кам иш ҳақининг 50 баробари миқдорида, финал босқичи иштирокчиларига эса 25 баробари миқдорида пул мукофотлари топширилди. Шу билан бирга ғолиблар жорий йилнинг декабр ойига қадар ривожланган хорижий мамлакатларнинг соҳага доир ташкилотларида 1 ойдан 3 ойгача малака оширадилар.

– Бугунги кунда ёш мутахассис-кадрларнинг бошқарувдаги ўрнига алоҳида эътибор қаратиляпти. Танловда ёшларнинг иштироки қай даражада бўлди?

– Дарҳақиқат, бугун юртимизнинг барча жабҳаларда ёшларнинг салоҳиятли иштироки яққол кўзга ташланмоқда. Ёш раҳбар-ҳодимларнинг сафи кенгаймоқда. Бугун Ўзбекистонда ёшларнинг нафақат ҳуқуқий, маънавий, иқтисодий-сиёсий манфаатлари ҳимоя қилинмоқда, балки уларнинг давлат бошқарувидаги роли ҳам ошмоқда. Жамиятимизда ўзининг билими,

салоҳияти ва истеъдоди билан ажралиб турувчи ёшларимизнинг кўпчилиги босқичма-босқич раҳбарлик лавозимларига тайинланмоқда. Чунки улар ўз Ватани олдидаги бурчи ва мақсад-вазифаларини теъран англаб етганлар.

– Сиз ҳам ёш, салоҳиятли раҳбарлардан бирисиз. Шунингдек, Ислом Каримов номидаги Техника университетида профессор Р.П. Бобоходжаев раҳбарлигида муҳим мавзуда докторлик диссертацияси устида ишламоқдасиз. Шу билан бирга ушбу университетнинг Энергетика факультети талабаларига илм зиёсини тарқатасиз. Сизга қандай лавозим таклиф этишди?

– Танловда қатнашишдан мақсадим қандайдир юқори раҳбарлик лавозимига эга бўлиш эмас, балки ўз билим ва тажрибамни синовдан ўтказишдан иборат эди. Олдинда ривожланган мамлакатларда малака оширишдек масала турибди. Мен учун, энг муҳими, докторлик диссертациясини ҳимоя қилиш. Лавозим масаласи илмий ишим ҳимоясидан кейин амалга ошса, нур устига аъло нур бўларди.

– Сиз каби ғолибликни қўлга киритган мутахассисларга тилақларингиз.

– Яқинда келажакда танлов ғолиблари мамлакатимизнинг турли юқори лавозимларида фаолият юритишлари кутилмоқда, мен уларнинг ишларига муваффақият тилаган ҳолда чин маънода ватанпарвар, халқпарвар раҳбар бўлишларини истар эдим. Мамлакатимиз тараққиёти ва равнақи йўлида уларни истеъдодларини амалда намоён этишларини жуда-жуда истардим. Шу ўринда мазкур танловнинг ғолиби сифатида шуни ғурур ва ифтихор билан айтаманки, “Тараққиёт” танлови ғолиби номига муносиб бўлиб, халқимиз фаровонлиги ва ватанимиз равнақи йўлида ўз билим ва салоҳиятимни ишга соламан.

Арофат МИРМУҲАМЕДОВА

